

Saknr: 2020/1401-1  
Saksbehandlar: Eirik Knive

## Saksgang

Utval	Utv.saknr.	Møtedato
Hovudutval for kultur, idrett og integrering		17.03.2020

## Tilskot til statlege tileigningar, bandlegging av friluftsområde 2020

## Forslag til Vedtak

Hovudutval for idrett, kultur og inkludering tilrår at Miljødirektoratet gjer vedtak om sikring av friluftsområde i følgjande prioritert rekkefølge:

Søkn.nr.	Søklar	Prosjektnamn	Tilrådd sum
1	Kvinnherad kommune	Baronifjæra	1 000 000
2	Bergen og Omland Friluftsråd	Geitvika	97 227
3	Bergen og Omland Friluftsråd	Hanstveitholmen	675 863
4	Bergen og Omland Friluftsråd	Kyrkjvatnet	566 525
5	Bjørnafjorden kommune	Steinavikjo	414 500
6	Askøy kommune	Skarvøy og Pariserholmene	714 100
7	Bergen og Omland Friluftsråd	Fløksand	338 400
8	Bergen og Omland Friluftsråd	Holsnebuviiken (Ormhilleren)	70 025
9	Bergen kommune	Kyrkjetangen	40 570
10	Bergen kommune	Venehaugen (Utnehagen)	81 390
11	Bergen kommune	Holmen	21 730
12	Bergen kommune	Breidalen-Midtneset (Brunestykket)	34 290
13	Bergen kommune	Storåkerrika	0
14	Bergen kommune	Storøen (Storøya)	0
15	Bergen kommune	Kalvtrevik og Storaneset	24 870
16	Bergen kommune	Marmorøyen, Flatøyna, Ulvøyna og holmer rundt	0
			<b>4 079 490</b>

Det vert vist til vedlegget med oversikt over søklarar for grunngeving av vedtaket.

**Samandrag**

Det viktigaste føremålet med statlege midlar til sikring av friluftslivområde, er at friluftslivet skal styrkast som ein helsefremjande, trivselsskapande og miljøvennleg fritidsaktivitet. Sikring av område for friluftsliv i nærområde er eit viktig verkemiddel for å nå grupper som er lite aktive. Areal i nærleiken av bustadområde som kan nåast utan bruk av bil eller båt, og som kan brukast av store folkegrupper i og ved byar og tettstader vert prioritert, til dømes allment tilgjengeleg grønstruktur i og ved byar og tettstader, landfaste område i kystsona og sentrale område ved innlandsvassdrag.

Per Morte Ekerhovd  
fylkesdirektør

Britt Karen Spjeld  
seksjonssjef idrett og friluftsliv

*Saksframlegget er godkjent elektronisk og har difor ingen handskriven underskrift*

## Saksutgreiing

I Vestland ligg 76% av alle statlege friluftsområde utanfor tettstader, medan 79% av innbyggjarane bur i byar eller tettstader. Areal i nærleiken av bustadområde som kan nåast utan bruka av bil eller båt, og som kan brukast av store folkegrupper i og ved byar og tettstader skal prioriterast for å nå dei befolkningsgruppene som er lite fysisk aktive og deltek lite innan friluftsliv.

Vestland fylkeskommune har ansvar for å vurdere og prioritere innkomne søknadar om tilskot til statleg sikring av friluftsområde, og sende søknadane vidare med ei tilråding til Miljødirektoratet innan 1. april. Sakene vert endeleg avgjort i Miljødirektoratet, og dei gir melding til søkar om utfallet innan 1. juli. Det er inga klagerett. Hovudutval for kultur, idrett og integrering får referatsak om utfallet i løpet av hausten. Klima- og miljødepartementet sine føringar, kartlegging og verdsetting av lokale friluftsområder i kommunane etter rettleiar M98 m.m. ligg til grunn for vurderingane.

Lokale friluftsområde, som primært vert nytta av brukarar frå ein kommune, kan få statleg støtte opptil 50% av kostnadane. Regionale friluftsområde, som også vert mykje brukt av tilreisande frå andre kommunar, kan få statleg støtte med opp til 100% av kostnadane.

Eit friluftsområde kan sikrast ved erverv av eigedomsrett eller ved avtale om varig bruksrett (servituttavtale). Vederlagsfri omgjerung inneberer at kommunen eller friluftsrådet søkar om at eit allereie etablert kommunalt friluftslivsområde skal få status som statleg sikra friluftslivsområde.

Det kan søkast om støtte til grunnleggjande istandsettingstiltak i same søknad, men Miljødirektoratet føretek ein grundig vurdering av naudsyntheita av slike tiltak. Alle statleg sikra område har rett til å søkje om midlar til opparbeiding. Dette er ein stor fordel ved å sikre områda.

Sikring av område for friluftsliv skal ikkje vere ein erstatning for ivaretaking av friluftsliv gjennom kommunale arealplanar, men vere eit supplement til slike planar. Fylkesrådmannen har vurdert søknadane og hatt innspelsmøte der fylkesmannen og planavdelinga til fylkeskommunen deltok. Område som er lett tilgjengeleg og blir/ vil bli intensivt nytta og som bør tilretteleggjast for friluftsliv er vektlagt. Samstundes er Vestland eit kystfylke kor mange friluftsområde langs kysten vert intensivt nytta, med og utan båt. Difor ønskjer friluftsråda i Vestland og å sikre og legge til rette fleire områder under kategorien båtutfartsområde, trass i at desse områda ikkje skal prioriterast gjennom dei nasjonale retningslinene for denne ordninga. Bergen og Omland friluftsråd har sendt ein prioriteringsliste over søknadane deira. Lista vert delvis teke omsyn til der den samsvarar med kriteria til Miljødirektoratet.

Samtlege søknadar kom frå Bergen og Omland friluftsråd, Bergen kommune og Kvinnherad kommune. Fjordane friluftsråd er eit nyoppstarta friluftsråd for 5 kommunar nord i fylket. Vestland fylkeskommune ønskjer å auke deira og andre kommunar si kompetanse og moglegheit til å søkje om statleg sikring av friluftsområde. I handlingsplanen til Vestkystparken 2020-2023 er det eit prioritert tiltak å halde sikringsseminar i Vestland i samarbeid med Miljødirektoratet, fylkeskommunen, kommunane og friluftsråda. Det er planlagt sikringsseminar i kommunane Bergen, Sogndal og Florø i mai.

### Føremål med ordninga

Føremålet med statlege midlar til sikring av friluftslivsområde, er å sikre areal slik at friluftslivet kan styrkast som ein helsefremjande, trivselsskapande og miljøvennleg fritidsaktivitet.

<b>Generelt:</b> Vedtakskompetanse: Hovudutval for kultur, idrett og integrering	
Budsjett Miljødirektoratet for 2020:	30 millionar kr
Søknadsfrist 2020:	15.01.2020
Vedtaks kriteria:	<a href="#">Rundskriv T-1/19</a>
Kriteria og informasjon om ordninga:	<a href="#">Informasjon</a>
Tal på søknadar:	16
Tal på søknadar innstilt til støtte:	16
Samla søknadssum:	4 079 490
Samla tilråding:	4 079 490

### Absolutte kriteria

- Det er kun kommunar og interkommunale friluftsråd kan søke på denne ordninga.

- For friluftsområde av nasjonal eller regional verdi kan staten medverke med inntil 100% av kostnadane. For område av hovudsakeleg lokal verdi kan staten medverke med inntil 50% av kostnadane.

#### Vurderingskriteria

- Areal som blir eller vil bli intensivt nytta av store folkegrupper, og som bør leggjast til rette for friluftslivsføremål vert prioritert.
- Landfaste område i kystsona og sentrale område ved innlandsvassdrag har høg prioritet.
- Søknader som er handsama og prioriterte i ein kommunal prosess etter plan- og bygningslova vil bli prioriterte.
- Ordninga kan normalt ikkje nyttast til å kjøpe bygningar. Unntak frå dette er bygningar som anten skal rivast eller som kan nyttast i friluftslivsamanheng i området.

#### Vurderingar og verknader

**Økonomi:** Tildelinga er i samsvar med statsbudsjett.

**Folkehelse:** *Regional plan for folkehelse 2014 - 2025 - fleire gode leveår for alle:* Kulturopplevingar har positiv verknad på folkehelsa.

**Regional planstrategi:** Regional plan for kultur i Sogn og Fjordane 2019-2027, *Kultur for alle*, og regional plan for kultur i Hordaland 2015-2025, *PREMISS: KULTUR* set mål for tilskot til kunst- og kulturføremål.

#### Vedlegg:

Oversikt over søknadane med vurdering.